



Jumat, 15 Oktober 2021
Ogen: Jeremia 17:7-7



Uratna Joler Kempak Lau



Pustaka Si Badia mekatep erbahan andingen kerna kegeluhen kalak si ernalem kempak Dibata bagi batang kayu si turah i tepi lau. Batang kayu e megegeh, mbelin, lego pe wari tetap meratah bulungna, tetap erbuah i bas paksana dengen ngasup ngalaken angin dengen udan si meter. Nabi Jeremia mereken kata man kalak Israel i bas paksa ngalaken perbeben si mberat e me pembuangan, e maka ibahan andingen kegeluhen enda bagi batang kayu. Kalak si ernalem man Dibata ngaloken pasu-pasu, kegeluhenna pas bagi batang kayu si turah i deher lau maler janah uratna seh ku bas lau. Banci si ukuri urat e me bagin i bas batang kayu si erguna muat nakan i bas taneh, dengen lau nari. Urat enda me si pemenana kal ndatken nakan ras lau e janah ngirimsa man batang, dahan ras bulung. Adi melala dat urat e nakan ras lau maka batang kayu e sehat, adi sehat pasti megegeh, adi megegeh ngasup ngalaken cuaca buruk, dengen tetap mereken buah si mejilena. Erdandanken si e urat tetap rusaha guna ndatken lau ras pangan, janah sada kesangapen kal banci turah deher lau maler. Bage me kegeluhen kalak si ernalem kempak Dibata. Kalak si tetap ernalem kempak Dibata bagi urat batang kayu e. Arus njoler kempak lau sabap bas lau e melala pangan, nutrisi, vitamin si maba kesehaten rikut ras gegeh. Kita me urat e, si maba se isi jabunta gelah ndatken kemalemen ate si rehna i bas Dibata nari. La banci lang adi ateta megegeh kita rikut ras se isi jabunta tetaplah deheri lau si maler e e me Tuhanta Jesus. IA si erbahanca kita megegeh, ngasup ngalaken erbage-bage persoalen geluh si nderpa seh maka la kita kote, la kita mbole erkiteken enggo sipanken vitamin e e me Kata Dibata dengen keleng ate Dibata si la ersibar man banta. Selaku Moria GBKP mari dege tetap rembakken diri kempak Dibata segelah tetap segar, sehat dengen erbuah kinitekenta aminna pe melala perbeben.